

7. gr.

Nú verður einhver eða einhverjar þeirra félagasamtaka og stofnana sem tilnefna fulltrúa í sjóðstjórn lagðar niður eða taka verulegum breytingum svo sem við skiptingu eða sameiningu og gerir þá fráfariandi fulltrúi viðkomandi stofnunar tillögu til sjóðstjórnar um tilnefningaraðila í sæti sitt. Sjóðstjórn sendir þá dómsmálaráðherra tillöguna ásamt umsögn sinni en hann ákveður þá að fenginni umsögn landbúnaðarráðherra nýjan tilnefningaraðila og breytir skipulagsskrá þessari í samræmi við það.

Nú breytast þjóðfélagshættir og aðstæður svo mjög að markmiðum sjóðsins verður ekki náð samkvæmt skipulagsskrá þessari og gerir þá sjóðstjórn ef hennar nýtur við, tillögu til dómsmálaráðherra um breytingu eða niðurfellingu á skipulagsskránni að fenginni umsögn landbúnaðarráðherra. Við slíka breytingu eða niðurfellingu skal litið til þeirra viðhorfa er birtust í lífsstarfi og ritverkum dr. Halldórs Pálssonar, sem stofnendur sjóðs þessa vilja árétt, að breyttu breytanda.

8. gr.

Leita skal staðfestingar dómsmálaráðherra á skipulagsskrá þessari.

Ólafur R. Dýrmondsson
f.h. Búnaðarfélags Íslands

Einar E. Gíslason
f.h. Landssamtaka sauðfjárbænda

Ólafur Sverrisson
f.h. Landssamtaka sláturleyfishafa

Sigurgeir Þorgeirsson
f.h. Rannsóknastofnunar landbúnaðarins

Böðvar Pálsson
f.h. Stéttarsambands bænda

Skipulagsskrá þessi staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá, nr. 19/1988.

Dóms- og kirkjumálaráðuneytið, 29. janúar 1991.

F. h. r.
Þorsteinn Geirsson.

Fanney Óskarsdóttir.

REGLUGERÐ

**um tollfrjálsan farangur ferðamanna og farmanna við komu
frá útlöndum, einkasölugjald o.fl.**

1. gr.

Ferðabúnaður og annar farangur.

Ferðamönnum búsettum hér á landi, er heimilt án greiðslu aðflutningsgjalda að hafa með sér við komu til landsins fatnað og ferðabúnað sem þeir hafa haft með sér héðan til útlanda og auk þess varning fenginn erlendis í ferðinni, um borð í flutningsfari eða í tollfrjálsri verslun hér á landi – auk varnings sem talinn er í 2. gr. – fyrir allt að 24 000 kr. að smásöluverði á innkaupsstað. Andvirði hvers hlutar má þó ekki nema hærri fjárhæð en 12 000 kr., og andvirði matvæla (þ.m.t. sælgæti) má ekki nema hærri fjárhæð en 4 000 kr. Magn matvæla má að

hámarki vera 3 kg að þyngd. Börn yngri en 12 ára skulu njóta að hálfu þeirra réttinda er að framan greinir.

Skipverjar og flugliðar innlendra farartækja svo og íslenskir farmenn og flugliðar erlendra farartækja sem leigð eru til nota hérlandis af íslenskum aðilum mega hafa með sér án greiðslu aðflutningsgjalda varning slíkan er greinir í 1. og 2. másl. 1. mgr. fyrir allt að 12 000 kr. við hverja komu til landsins, hafi þeir verið skemur en 15 daga í ferð, en 24 000 kr. fyrir lengri ferð. Andvirði hvers hlutar má þó ekki nema hærri fjárhæð en 12 000 kr. Andvirði matvæla (þ.m.t. sælgæti) samkvæmt þessari málsgrein má ekki nema hærri fjárhæð en 4 000 kr. en magn þeirra má að hámarki vera 3 kg að þyngd.

Ferðamönnum búsettum erlendis er heimilt án greiðslu aðflutningsgjalda að hafa með sér íverufatnað, sængurföt, viðlegubúnað og annan ferðabúnað (þ.m.t. matvæli og aðrar vistir) til eigin nota á ferðalaginu, enda geti varningur þessi talist hæfilegur og eðlilegur miðað við tilgang ferðalagsins, dvalartíma viðkomandi hérlandis og hagi hans að öðru leyti og varningurinn verði ennfreður fluttur úr landi við brottför eiganda að svo miklu leyti sem hann eyðist ekki hérlandis. Andvirði matvæla (þ.m.t. sælgæti) sem hver ferðamaður flytur til landsins má ekki nema hærri fjárhæð en 4 000 kr. en magn þeirra má að hámarki vera 3 kg að þyngd.

2. gr.

Áfengir drykkir og tóbaksvörur.

Auk varnings samkvæmt 1. gr. er ferðamönnum og áhöfnum heimilt að hafa meðferðis án greiðslu aðflutningsgjalda eftirtalið magn af áfengum drykkjum og tóbaksvörum:

	Áfengi, ekki yfir 50% styrkleika	Áfengi undir 22% styrkleika	Öl	Tóbak
1. Ferðamenn	1,0 l	1,0 l	Ekkert	200 stk. vindlingar eða 250 g af öðru tóbaki.
	eða 1,0 l	Ekkert	6 l (erlent) eða 8 l (innlent)	200 stk. vindlingar eða 250 g af öðru tóbaki.
	eða Ekkert	1,0 l	6 l (erlent) eða 8 l (innlent)	200 stk. vindlingar eða 250 g af öðru tóbaki.
	eða Ekkert	2,0 l	Ekkert	200 stk. vindlingar eða 250 g af öðru tóbaki.

2. Skipverjar á íslenskum

skipum og erlendum skipum í leigu íslenskra aðila og með íslenskum áhöfnum sem eru 15 daga eða lengur í ferð (skipstjóra, yfirstýrimanni, yfirvélstjóra og bryta, svo og matsveinum á farþega- og vöruflutningaskipum er heimill jafnstór aukaskammtur til risnu)

1,5 l

3,0 l

Ekkert

400 stk vindlingar eða 500 g af öðru tóbaki.
400 stk vindlingar eða 500 g af öðru tóbaki.

eða 1,5 l

Ekkert

24 l (erlent)
eða
32 l (innlent)

3. Skipverjar á skipum samkvæmt 2. tl. þessarar greinar sem eru skemur en 15 daga í ferð (skipstjóra og yfirstýrimanni, yfirvélstjóra og bryta á farþega- og vöruflutningaskipum er heimill jafnstór aukaskammtur til risnu) og skipverjar á erlendum skipum (skipstjóra er heimill jafnstór aukaskammtur til risnu)

0,75 l

1,5 l

Ekkert

200 stk. vindlingar eða 250 g af öðru tóbaki.
200 stk. vindlingar eða 250 g af öðru tóbaki.

eða 0,75 l

Ekkert

12 l (erlent)
16 l (innlent)

4. Flugáhafnir

(þ.m.t. aukaáhafnir)

0,375 l

Ekkert

6 l (erlent)
eða
8 l (innlent)

100 stk. vindlingar eða 125 g af öðru tóbaki.

eða 0,375 l

0,75 l

Ekkert

100 stk. vindlingar eða 125 g af öðru tóbaki.
100 stk. vindlingar eða 125 g af öðru tóbaki.

eða Ekkert

0,75 l

6 l (erlent)
eða
8 l (innlent)

5. Flugáhafnir, aðrar (þ.m.t. auka-
áhafnir), á íslenskum flugvélum sem
hafa 15 daga samfellda útivist eða lengri

.....	1,0 l	0,75 l	Ekkert	200 stk. vindlingar eða 250 g af öðru tóbaki.
eða	1,0 l	Ekkert	6 l (erlent) eða 8 l (innlent)	200 stk. vindlingar eða 250 g af öðru tóbaki.
eða	Ekkert	0,75 l	6 l (erlent) eða 8 l (innlent)	200 stk. vindlingar eða 250 g af öðru tóbaki.

Í þessu sambandi reiknast hver vindill vega 5 g, hver smávindill 2,5 g og hver vindlingur 1,25 g. Smávindlar sem eru 1,5 g og léttari reiknast sem vindlingar.

Skipverjar á íslenskum skipum sem í fyrsta sinn er siglt til íslenskrar hafnar eða hafa verið erlendis til viðgerðar eða breytinga skulu tollafgreiddir samkvæmt 3. tölul.

Ef skip í utanlandssiglingum hefur viðdvöl hér samfleytt í sjö daga er tollstjóra heimilt að beiðni eiganda skips að veita skipverjum undan innsigli 200 stk. af vindlingum eða 250 g af öðru tóbaki til hverra sjö daga. Skipstjóra, yfirstýrimanni, yfirvélstjóra og bryta svo og matsveinum á farþega- og vöruflutningaskipum er heimill jafnstór aukaskammtur til risnu. Ekki skal veita undan innsigli sama dag og skip leggur úr höfn. Eiganda skips er skylt að greiða kostnað fyrir afgreiðslu samkvæmt þessari málsgrein.

Lágmarksaldur til innflutnings áfengis samkvæmt reglum þessum er 20 ár og 16 ár að því er varðar innflutning á tóbaki. Tollgæslumaður getur krafist þess að lágmarksaldur sé sannaður með framvísun persónuskilríkja.

3. gr.

Tollívilnanir samkvæmt 1. og 2. gr. gilda um varning sem viðkomandi far- eða ferðamaður hefur í eigin vörslu við komu frá útlöndum og innfluttur er til persónulegra nota viðkomandi, fjölskyldu hans eða til gjafa. Ennfremur er heimilt að leyfa tollfrjálsan innflutning farangurs sem orðið hefur viðskila við eiganda, enda sýni hann fram á með vottorði tollgæslunnar að hann hafi ekki nýtt sér tollfríðindi samkvæmt 1. gr. þegar hann kom til landsins.

Flugliðar, far- og ferðamenn njóta ekki tollívilnunar samkvæmt 1. og 2. gr. oftast en einu sinni á sama sólarhring.

Sé verðmæti hlutar sem framvísað er meira en um ræðir í 1. gr. getur viðkomandi notið tollfríðinda samkvæmt 1. gr. enda greiði hann aðflutningsgjöld af því verðmæti sem umfram er tollívilnun.

4. gr.

Með aðflutningsgjöldum í reglugerð þessari er átt við toll, virðisaukaskatt og einkasölu-
gjald og þau gjöld önnur sem lögð eru á og innheimt við tollafgreiðslu á innfluttum vörum.

5. gr.

Innflutningsbann og -takmarkanir.

Ákvæði reglugerðar þessarar veita hvorki undanþágu frá innflutningsbanni né innflutningstakmörkunum á ýmsum vörutegundum samkvæmt lögum, reglugerðum, eða öðrum stjórnvaldsfyrirmælum.

Meðal vara sem innflutningur er bannaður á eru eftirtaldar vörutegundir:

1. Ávana- og fíkniefni, eins og Asetorfin, Desómorfin, DET, DMHP, DMT, Etorfin, Heróín, Kókaín, Kannabis (Marihuana) og Kannabis harpeis, Ketóbemídón, Lýsergíð (LSD, LSD- 25) Meskalín (peyote), Parahexýl, Psílosíne, Psílotsín, Psílocybin, STP, DOM, Tetrahýdrócannabínólar, allir ísómerar.
2. Ósoðið kjötmeti og kjötvörur ýmiss konar, t.d. þurrkað kjötmeti, ósoðin reykt svínslæri, beikon, svínahryggir, reyktar ósoðnar pylsur, ósoðnir fuglar og fuglainnyfli, fersk eða fryst, innmatur, svið og blóð.
3. Ósoðin mjólk, ósoðin egg, eggjaduft og sykraðar eggjarauður.

Meðal vara sem háðar eru innflutningsleyfum eru eftirtaldar vörutegundir:

1. Lyf umfram hæfilegt magn til persónulegra þarfa viðkomandi far- eða ferðamanns.
2. Skotvopn, skotfæri og sprengiefni.
3. Símar, talstöðvar, radiósendar og viðtæki sem ekki eru ætluð til almennrar útvarpsviðtöku.
4. Lifandi dýr.

Tollfríðindi geta náð til vara, sem háðar eru innflutningsleyfum, enda sé þess gætt að tilskilin leyfi séu fyrir hendi.

6. gr.

Framvísunarskylda o.fl.

Farþegi sem kemur til landsins frá útlöndum skal við komu ótilkvaddur skýra tollgæslumanni frá og framvísa við hann tollskyldum varningi sem hann hefur meðferðis svo og þeim varningi sem háður er innflutningstakmörkunum eða innflutningsbanni. Af tollskyldum varningi sem heimilaður er innflutningur á skal greiða aðflutningsgjöld með venjulegum hætti.

Þar sem tollafgreiðsla farþega fer fram er tollstjóra heimilt að hafa aðskilda tollafgreiðslu, annars vegar fyrir þá sem hafa engan tollskyldan farangur meðferðis við komu til landsins og hins vegar fyrir þá sem annað hvort hafa tollskyldan farangur meðferðis eða farangur sem háður er innflutningstakmörkunum eða innflutningsbanni. Fyrirnefndir farþegar skulu ganga um hlið, merkt grænu áttýrndu skilti með áletruninni: „ENGINN TOLL-SKYLDUR VARNINGUR“. Síðarnefndir farþegar skulu ganga um hlið, merkt rauðu ferhyrnu skilti með áletruninni: „TOLLSKYLDUR VARNINGUR“. Við skiltin skal skráð „TOLLGÆSLA“. Áletranir skulu vera á íslensku og þeim erlendu tungumálum sem tollstjóra þykir ástæða til. Um leið og farþegi hefur gengið um hlið sem merkt er samkvæmt framansögðu telst hann hafa svarað því hvort hann hafi meðferðis tollskyldan varning eða varning sem háður er innflutningstakmörkunum eða innflutningsbanni.

Við tollafgreiðslu aðkomufars skal sérhver farmaður gera tollgæslunni skriflega grein fyrir öllum varningi sem hann hefur fengið erlendis eða í ferðinni, hvort sem hann er tollskyldur eða ekki og eins þótt sá varningur kunni að vera háður innflutningstakmörkunum eða innflutningsbanni. Einnig skal hann gera tollgæslunni skriflega grein fyrir áður fengnum tollskyldum varningi, en ótollafgreiddum, sem notaður er um borð í fari. Framvísa ber við tollgæslumann þeim varningi sem kann að vera háður innflutningstakmörkunum eða innflutningsbanni svo og öðrum þeim varningi sem tollgæslumaður óskar eftir að skoða.

Óski tollgæslumaður eftir því að skoða farangur farþega eða farmanns skulu þeir veita til þess alla aðstoð með því að opna töskur og umbúðir, taka upp úr þeim og gefa þær upplýsingar

um farangurinn sem um er beðið. Komi fram varningur við þessa skoðun sem ekki er greint frá eins og fyrir er mælt hér að framan skoðast hann ólöglega innfluttur og er þá heimilt að gera hann upptækan til ríkissjóðs auk þess sem viðkomandi kann að þurfa að sæta refsingu.

7. gr.

Um einkasölugjald o.fl.

Nú hefur einhver af áhöfn fars eða farþegi við komu til landsins meðferðis meira magn af varningi en heimilaður er tollfrjáls innflutningur á samkvæmt 2. gr. og ríkið eða stofnanir þess hafa einkasölu á og er viðkomandi þá heimilt að halda til viðbótar allt að þreföldu því magni sem þar greinir gegn greiðslu einkasölugjalds samkvæmt eftirfarandi gjaldskrá, enda hafi viðkomandi gert grein fyrir og framvísað varningnum við tollgæslu eins og fyrir er mælt í reglugerð þessari:

A. Áfengi:

kr./l

1. Rauðvín, hvítvín, ljós rauðvín og freyðivín	650
2. Portvín, sherry, madeira, vermút, líkjörar og aperítívar, þ.m.t. bitterar undir 22% styrkleika	870
3. Aperítívar, þ.m.t. bitterar með 22% styrkleika eða meira	1 190
4. Koníak, brandy, whisky, vodka, gin, genever, romm, líkjörar ót. a., svo og aðrar sterkar tegundir, ót. a.	2 050
5. Öl (24 stk. af 33 cl dósum)	2 145

B. Tóbak:

1. Reyktóbak	1 670 kr./tylft bréfa eða lb.
2. Vindlingar	1 010 kr./200 stk.
3. Smávindlar	110 kr./10 stk.
4. Vindlar, meðalstærð	470 kr./25 stk.
5. Vindlar, aðrir	605 kr./25 stk.

Sé um að ræða aðrar stærðir umbúða en að ofan greinir skal greitt hlutfallslega.

Nú er framvísað meira magni en um getur í 1. mgr. og getur tollstjóri þá heimilað innflutning gegn greiðslu einkasölugjalds ef sérstakar ástæður eru fyrir hendi en elia gert varninginn upptækan til ríkissjóðs.

Pegar um er að ræða tækifæris- og gjafasendingar frá útlöndum á áfengi og tóbaki má hver sending ekki nema meira magni en tvöföldu því sem tilgreint er í 1. tölul. 1. mgr. 2. gr. Greiða skal einkasölugjald af slíkum sendingum eftir gjaldskránni í 1. mgr. þessarar greinar.

8. gr.

Sérhverja afgreiðslu samkvæmt 7. gr. skal færa í sérstaka afgreiðslubók. Þar skal fært inn magn og tegund varnings sem greitt er af, svo og gjöld þau sem innheimt eru, en innflytjandi á rétt á að fá greiðslukvittun. Ennfremur skal varningurinn auðkenndur með sérstökum merkimiðum sem Áfengis- og tóbaksverslun ríkisins lætur tollgæslunni í té og gerðir skulu í samráði við ríkistollstjóra. Ríkistollstjóri getur ákveðið að framangreindur varningur verði auðkenndur með öðrum hætti.

9. gr.

Einkasölugjald sem innheimt er samkvæmt 7. gr. skal sent viðkomandi einkasölu svo fljótt sem kostur er og eigi síðar en tveim mánuðum eftir að afgreiðsla fór fram.

10. gr.

Nú er varningur sem tollafgreiddur er samkvæmt reglugerð þessari seldur eða boðinn til sölu án þess að aðflutningsgjöld hafi áður verið greidd og varðar það þá refsingu samkvæmt XIV. kafla tollalaga nr. 55 30. mars 1987, með áorðnum breytingum.

11. gr.

Reglugerð þessi, er sett samkvæmt heimild í 4. og 5. tl. 5. gr. og 20. tl. 6. gr. tollalaga nr. 55 30. mars 1987, með áorðnum breytingum, og 3. mgr. 1. gr. laga nr. 63 28. maí 1969, um verslun ríkisins með áfengi, tóbak og lyf, með áorðnum breytingum, til að öðlast gildi þegar í stað. Jafnframt er úr gildi felld reglugerð nr. 547/1990, um sama efni.

Fjármálaráðuneytið, 4. febrúar 1991.

F. h. r.

Magnús Pétursson.

Guðrún Ásta Sigurðardóttir.

AUGLÝSING

um listabókstafi stjórnmálasamtaka.

Við alþingiskosningarnar 25. apríl 1987 buðu eftirtalin stjórnmálasamtök fram lista og voru listarnir merktir sem hér segir:

- | | | | |
|---|------------------------|---|-------------------------------------|
| A | Alþýðuflokkur | J | Samtök um jafnrétti og félagshyggju |
| B | Framsóknarflokkur | M | Flokkur mannsins |
| C | Bandalag jafnaðarmanna | S | Borgaraflokkur |
| D | Sjálfstæðisflokkur | V | Samtök um kvennalista |
| G | Alþýðubandalag | P | Þjóðarflokkur |

Þetta auglýsist hér með samkvæmt 40. gr. laga um kosningar til Alþingis, nr. 80 16. október 1987.

Dóms- og kirkjumálaráðuneytið, 1. febrúar 1991.

F. h. r.

Ólafur W. Stefánsson.